



UKA 2015/165
22.oktober 2015
Peter Olsen

Uunga siunnersuut: Suliffeqarnermi innersuussisarneq il.il. pillugit Inatsisartut inatsisaata allannguuteqartinneqarnera pillugu Inatsisartut inatsisaat nr. xx yy 2015-imeersoq

(Nuttarnerulersitsinissamat ikiorsiissutit atorneqarnerulernissaat)

(Inuussutissarsiornermut, Suliffeqarnermut Niuernermet Nunanullu Allanut Naalakkersuisoq)

Oqaluuserisassamat siuliani pineqartumut matumuuna Inuit Ataqatigiinniit imatut oqaaseqaa-teqassaavut.

Naak nunatta ilaani, piffissap ilaani suliffissaaleqineq malunnaatilimmik appariatorsimagaluartoq, naallu tamanna nuannaarutissaagaluartoq, taamaattoq nunatsinni suliffissaaleqinerup suli qaffasippallaarnerujussuarnera akuersaarneqarsinnaanngitsoq nassuerutigisiariaqarparput.

Nunarsuarmi qeqertat annersaanni, sineriassuarmi angeqisumi avinngarusumaqisumilu siammarsimalluta Inuit ikitsunnguulluta najugaqarpugut. Nunarsuarmi tamani tikikkumi-naannerpaami, angallavigiuminaannerpaami, inuuniarfigiumaannerpaami, nunarsuarmilu tamani akisunerpaami najugaqarluta.

Nunatta immikkoortuiasa ilaani inuussutissarsiornikkut periarfissat, erngup olie-llu assigiinnginnerattut assigiinngitsigaat; kujataani, qeqqani, avannaani, avannaarsuani, nunattalu kangiani.

Piffiit ilaanni savassaaleqisut piffiillu ilaanni savassaaleqinngitsut. Piffiit ilaanni mattassaaleqisut, piffiit ilaanni mattaassaaleqinngitsut. Piffiit ilaanni neqissaaleqisut, piffiit ilaanni neqissaaleqinngitsut. Piffiit ilaanni suliffissaaleqisut, piffiit ilaanni sulisussaaleqisut. Ukiuuppat, ukiaappat, upernaajuppat aasaappalluunniit.

Pingaartumik aasaanerani tamanna malunnarnerpaajusarluni.

Silarput unigani ingerlagami malersorlugu piniangitsuni nukillaarutaalerumaarmat, nukillaarutaaleqqunagu annernaraluaraluarpalluunniit eqaatsumillu aaliangersinnaaneq, aqqissuteqarsinnaanerlu pingaaruteqarluinnarpoq; inuttut naalakkersuinikkullu.

Illoqarfigisanni nunaqarfigisanniluunniit suliffissaqanngikkuma, illoqarfimmi nunaqarfimmiluunniit allami suliffisaqaruma, taava allatut ajornaqaaq, imminut nunarpullu pillugit suliffissalimmut nuuttariaqarpunga, kisianni nuunnissannut akissaqanngikkuma taava qanoq iliorsinnaavunga?

Tamannarpiaq pillugu naalakkersuinikkut 2003-mili nuttarnerulersitsinissaq pillugu ileqqoreqqusaliorsimavugut, ilaatigut angalanermut tapiissuteqartalersinnaanerput ajornannginnerulersinniarlugu, suliffissaaleqisoq illoqarfiginngisaminut suliffissarsiorsimalluni suliffittarsimappat angalanissaanut tapiissuteqartalersinnaanngorluta.

Ileqqoreqqusarput kingullermik 2014-mi nutarterneqalaarsimagaluarsinnarluni, ullumikkut suli nutarteqqillugu eqaannerulersilugulu aqqinnialerparput; naammaattumik piginnaasaqartuunissamik piumasaqaat peerneqarpoq, pisariaqartitsineq naapertorlugumut aqqinneqarluni, taamatuttaaq inissaqarnissamat tunngatillugu piumasaqaat annikillisinneqarpoq, sulisitsup inissamik qulakkeerinneqqaarsimanissaanik piumasaqaat

annikillisinneqarpoq, suliffissarsiortoq nammineerluni inissamik nassaarsimappat tamanna naammagineqartunngorluni, naggataatigullu atorfik pillugu oqaloqateqariartornermut aammalu suliffimmik misiliartortilluni angalaniarnernut tunngatillugu nuttarnerulersitsiniarluni ikiorsiissutinit tapiisoqarsinnaalerluni.

Tamaatut oqaaseqarluta oqaluuserisassaq taperserlugu ataatsimiisitaliamut susasaqartumut ingerlateqqitassanngorlugu Inuit Ataqatigiinniit akuersaarparput.